

漢
魏
叢
書

論衡卷第十六

漢 會稽王充著

明 新安程榮校

亂龍篇

遭虎篇

商蟲篇

講瑞篇

亂龍篇

董仲舒申春秋之雩設土龍以招雨其意以雲龍相
致易曰雲從龍風從虎以類求之故設土龍陰陽從
類雲雨自至儒者或問曰夫易言雲從龍者謂真龍

也豈謂土哉楚葉公好龍墻壁繫孟皆畫龍必以象類爲若真是則葉公之國常有雨也易又曰風從虎謂虎嘯而谷風至也風之與虎亦同氣類設爲土虎置之谷中風能至乎夫土虎不能而致風土龍安能而致雨古者畜龍乘車駕龍故有秦龍氏御龍氏夏后之庭二龍常在季年夏衰二龍低伏真龍在地猶無雲雨况僞象乎禮畫雷樽象雷之形雷樽不聞能致雷土龍安能而動雨頓牟掇芥磁石引針皆以其真是不假他類他類肖似不能掇取者何也氣性異

殊不能相感動也劉子駿掌雩祭典土龍事桓君山亦難以頓牟磁石不能真是何能掇針取芥子駿窮無以應子駿漢朝智囊筆墨淵海窮無以應者是事非議誤不得道理實也曰夫以非真難是也不以象類說非也夫東風至一有酒湛溢鯨魚死彗星出天道自然非人事也事與彼雲龍相從同一實也日火也月水也水火感動常以真氣今伎道之家鑄陽燧取飛火於日作方諸取水於月非自然也而天然之也土龍亦非真何爲不能感天一也陽燧取火於天

五月丙午日中之時消煉五石鑄以爲器乃能得火
今妄取刀劔偃月之鉤摩以向日亦能感天夫土龍
旣不得比於陽燧當與刀劔偃月鉤爲比二也齊孟
嘗君夜出秦關關未開客爲鷄鳴而真鷄鳴和之夫
雞可以姦聲感則雨亦可以僞象致三也李子長爲
政欲知囚情以梧桐爲人象囚之形鑿地爲堦以盧
爲擲卧木囚其中囚罪正則木囚不動囚寃侵奪木
囚動出不知囚之精神着木人乎將精神之氣動木
囚也夫精神感動木囚何爲獨不應從土龍四也舜

以聖德入大麓之野虎狼不犯蟲蛇不害禹鑄金鼎
象百物以入山林亦辟凶殃論者以爲非實然而上
古久遠周鼎之神不可無也夫金與土同五行也使
作土龍者如禹之德則亦將有雲雨之驗五也頓牟
掇芥礲石鉤象之石非頓牟也皆能掇芥土龍亦非
真當與礲石鉤象爲類六也楚葉公好龍墻壁盂樽
皆畫龍象真龍聞而下之夫龍與雲雨同氣故能感
動以類相從葉公以爲畫致真龍今獨何以不能致
雲雨七也神靈示人以象不以實故寢卧夢悟見事

之象將吉吉象來將凶凶象至神靈之氣雲雨之類
八也神靈以象見實土龍何獨不能以偽致真也上
古之人有神荼鬱壘者昆弟二人性能執鬼居東海
度朔山上立桃樹下簡閱百鬼鬼無道理妄爲人禍
荼與鬱壘縛以盧索執以食虎故今縣官斬桃爲人
立之戶側畫虎之形著之門闌夫桃人非荼鬱壘也
畫虎非食鬼之虎也刻畫效象莫以禦凶今土龍亦
非致雨之龍獨信桃人畫虎不知土龍九也此尚因
緣昔書不見實驗魯般墨子刻木爲鳶蜚之三日而

不集爲之巧也使作土龍者若魯般墨子則亦將有
木鳶蜚不集之類夫蜚鳶之氣雲雨之氣也氣而蜚
木鳶何獨不能從土龍十也夫雲雨之氣也知於蜚
鳶之氣未可以言釣者以木爲魚丹漆其身近之水
流而擊之起水動作魚以爲真並來聚會夫丹木非
真魚也魚含血而有知猶爲象至雲雨之知不能過
魚見土龍之象何能疑之十一也此尚魚也知不如
人匈奴敬畏郅都之威刻木象都之狀交弓射之莫
能一中不知都之精神在形象邪亡也將匈奴敬鬼

精神在木也如都之精神在形象天龍之神亦在土龍如匈奴精在於木人則雩祭者之精亦在土龍十二也金翁叔休屠王之太子也與父俱來降漢父道死與母俱來拜爲騎都尉母死武帝圖其母於甘泉殿上署曰休屠王焉提翁叔從上上甘泉拜謁起立向之泣涕沾襟久乃去夫圖畫非母之實身也因見形象涕泣輒下思親氣感不待實然也夫土龍猶甘泉之圖畫也雲雨見之何爲不動十三也此尚夷狄也有若似孔子孔子死弟子思慕共坐有若孔子之

座弟子知有若非孔子也猶共坐而尊事之雲雨之知使若諸弟子之知雖知土龍非真然猶感動思類而至十四也有若孔子弟子疑其體象則謂相似孝武皇帝幸李夫人夫人死思見其形道士以術爲李夫人夫人步入殿門武帝望見知其非也然猶感動喜樂近之使雲雨之氣如武帝之心雖知土龍非真然猶愛好感起而來十五也既效驗有十五又亦有義四焉立春東耕爲土象人男女各二人秉耒把鋤或立土牛未必能耕也順氣應時示率下也今設土

龍雖知不能致雨亦當夏時以類應變與立土人土
牛同一義也禮宗廟之主以木爲之長尺二寸以象
先祖孝子入廟主心事之雖知木主非親亦當盡敬
有所主事土龍與木主同雖知非真示當感動立意
於象二也塗車芻靈聖人知其無用示象生存不敢
無也夫設土龍知其不能動雨也示若塗車芻靈而
有致三也天子射熊諸侯射麋卿大夫射虎豹士射
鹿豕示服猛也名布爲侯示射無道諸侯也夫畫布
爲熊麋之象名布爲侯禮貴意象示義取名也土龍

亦夫熊麋布侯之類四也夫以象類有十五驗以禮
示意有四義仲舒覽見深鴻立事不妄設土龍之象
果有狀也龍鬚出水雲雨乃至古者畜龍御龍常存
無雲雨猶舊交相關遠卒然相見歡欣歌笑或至悲
泣涕偃伏少久則示行各恍忽矣易曰雲從龍非言
龍從雲也雲搏刻雷雲之象龍安肯來夫如是傳之
者何可解則桓君山之難可說也則劉子駿不能對
劣也劣則董仲舒之龍說不終也論衡終之故曰亂
龍者終也

遭虎篇

變復之家謂虎食人者功曹爲姦所致也其意以爲
功曹衆吏之率虎亦諸禽之雄也功曹爲姦采漁於
吏故虎食人以象其意夫虎食人人亦有殺虎謂虎
食人功曹受取於吏如人食虎吏受於功曹也乎案
世清廉之士百不能一居功曹之官皆有姦心私舊
故可以倖苞苴賂遺小大皆有必謂虎應功曹是野
中之虎常害人也夫虎出有時猶龍見有期也陰物
以冬見陽蟲以夏出出應其氣氣動其類參伐以冬

出心尾以夏見參伐則虎星心尾則龍象象出而物見氣至而類動天地之性也動於林澤之中遭虎搏噬之時稟性狂勃貪叨饑餓觸自來之人安能不食人之筋力羸弱不適巧便不知故遇輒死使孟賁登山馮婦入林亦無此害也孔子行魯林中婦人哭甚哀使子貢問之何以哭之哀也曰去年虎食吾夫今年食吾子是以哭哀也子貢曰若此何不去也對曰吾善其政之不肯吏之不暴也子貢還報孔子孔子曰弟子識諸苛政暴吏甚於虎也夫虎害人古有之

矣政不苛吏不暴德化之足以却虎然而二歲比食
二人林中獸不應善也爲廉不應姦吏亦不應矣或
曰虎應功曹之姦所謂不苛政者非功曹也婦人廉
吏之部也雖有善政安耐化虎夫魯無功曹之官功
曹之官相國是也魯相者殆非孔墨必三家也爲相
必無賢操以不賢居權位其惡必不廉也必以相國
爲姦令虎食人是則魯野之虎常食人也水中之毒
不及陵上陵上之氣不入水中各以所近罹殃取禍
是故漁者不死於山獵者不溺於淵好入山林窮幽

測深涉虎窟寢虎搏噬之何以爲變魯公牛哀病化爲虎搏食其兄同變化者不以爲怪入山林草澤見害於虎怪之非也蝮蛇悍猛亦能害人行止澤中於蝮蛇應何官吏蜂蠆害人入毒氣害人入水火害人入爲蜂蠆所螫爲毒氣所中爲火所燔爲水所溺又誰致之者苟諸禽獸乃應吏政行山林中麋鹿野豬牛象熊羆豺狼蝮蠆皆復殺人苟謂食人乃應爲變蝮蠆閩蚩皆食人人身疆大故不至死倉卒之世穀食之貴百姓饑餓自相啖食厥變甚於虎變復之家

不處苛政且虎所食非獨人也含血之禽有形之獸
虎皆食之人謂應功曹之姦食他禽獸應何官吏夫
虎毛蟲人倮蟲毛蟲饑食倮蟲何變之有四夷之外
大人食小人虎之與蠻夷氣性一也平陸廣都虎所
不由也山林草澤虎所生出也必以虎食人應功曹
之姦是則平陸廣都之縣功曹常爲賢山林草澤之
邑功曹常伏誅也夫虎食人於野應功曹之姦虎時
入邑行於民間功曹游於閭巷之中乎實說虎害人
於野不應政其行都邑乃爲怪夫虎山林之獸不狎

之物也常在草野之中不爲馴畜猶人家之有鼠也
伏匿希出非可常見也命吉居安鼠不擾亂祿衰居
危鼠爲殃變夫虎亦然也邑縣吉安長吏無患虎匿
不見長吏且危則虎入邑行於民間何則長吏光氣
已消都邑之地與野均也推此以論虎所食人亦命
時也命訖時衰光氣去身視肉猶尸也故虎食之天
道偶會虎適食人長吏遭惡故謂爲變應上天矣古
今凶驗非唯虎也野物皆然楚王英宮樓未成鹿走
上堦其後果薨魯昭公旦出鸚鵡來巢其後季氏逐

昭公昭公奔齊遂死不還賈誼爲長沙王傅鵬鳥集舍發書占之曰主人將去其後遷爲梁王傅懷王好騎墜馬而薨賈誼傷之亦病而死昌邑王時夷鵠鳥集宮殿下王射殺之以問郎中令龔遂龔遂對曰夷鵠野鳥入宮亡之應也其後昌邑王竟亡盧奴令田光與公孫弘等謀反其且覺時狐鳴光舍屋上光心惡之其後事覺坐誅會稽東部都尉禮文伯時羊伏廳下其後遷爲東萊太守都尉王子鳳時麇入府中其後遷丹陽太守夫吉凶同占遷免一驗俱象空亡

精氣消去也故人且亡也野鳥入澤城且空也草蟲入邑等類衆多行事比肩略舉較著以定實驗也

商蟲篇

變復之家謂蟲食穀者部吏所致也貪則侵漁故蟲食穀身黑頭赤則謂武官頭黑身赤則謂文官使加罰於蟲所象類之吏則蟲滅息不復見矣夫頭赤則謂武吏頭黑則謂文吏所致也時或頭赤身白頭黑身黃或頭身皆黃或頭身皆青或皆白若魚肉之蟲應何官吏時或白布豪民猾吏被刑乞貸者威勝於

官取多於吏其蟲形象何如狀哉蟲之滅也皆因風
雨案蟲滅之時則吏未必伏罰也陸田之中時有鼠
水田之中時有魚蝦蟹之類皆爲穀害或時希出而
暫爲害或常有而爲災等類衆多應何官吏魯宣公
履畝而稅應時而有蝼生者或言若蝗蝗時至蔽天
如雨集地食物不擇穀草察其頭身象類何吏變復
之家謂蝗何應建武三十一年蝗起太山郡西南過
陳留河南遂入夷狄所集鄉縣以千百數當時鄉縣
之吏未皆履畝蝗食穀草連日老極或蜚徙去或止

枯死當時鄉縣之吏未必皆伏罪也夫蟲食穀自有止期猶蠶食桑自有足時也生出有日死極有月期盡變化不常爲蟲使人君不罪其吏蟲猶自亡夫蟲風氣所生蒼頡知之故凡蟲爲風之字取氣於風故八日而化生春夏之物或食五穀或食衆草食五穀吏受錢穀也其食他草受人何物俾蟲三百人爲之長由此言之人亦蟲也人食蟲所食蟲亦食人所食俱爲蟲而相食物何爲怪之設蟲有知亦將非人曰女食天之所生吾亦食之謂我爲變不自謂爲災凡

含氣之類所甘嗜者口腹不異人甘五穀惡蟲之食
自生天地之間惡蟲之出設蟲能言以此非人亦無
以詰也夫蟲之在物間也知者不怪其食萬物也不
謂之災甘香渥味之物蟲生常多故穀之多蟲者稔
也稻時有蟲麥與且無蟲必以有蟲責主者吏是其
稔鄉部吏常伏罪也神農后稷藏種之方煮馬屎以
汁漬種者令禾不蟲如或以馬屎漬種其鄉部吏鮑
焦陳仲子也是故后稷神農之術用則其鄉吏何免
爲姦何則蟲無從生上無以察也蟲食他草平事不

怪食五穀葉乃謂之災桂有蠹桑有蝎桂中藥而桑
給蠶其用亦急與穀無異蠹蝎不爲怪獨謂蟲爲災
不通物類之實闇於災變之情也穀蟲曰蠹蠹若蛾
矣粟米饘熟生蠹夫蠹食粟米不謂之災蟲食苗葉
歸之於政如說蟲之家謂粟輕苗重也蟲之種類衆
多非一魚肉腐臭有蟲醯醬不閉有蟲飯温濕有蟲
書卷不舒有蟲衣襪不懸有蟲蝸疽螳螻蠹蝦有蟲
或白或黑或長或短大小鴻殺不相似類皆風氣所
生并連以死生不擇日若生日短促見而輒滅變復

之家見其希出出又食物則謂之災災出當有所罪
則依所似類之吏順而說之人腹中有三蟲下地之
澤其蟲曰蛭蛭食人足三蟲食腸順說之家將謂三
蟲何似類乎凡天地之間陰陽所生蛟螭之類蜚蠊
之屬含氣而生開口而食食有甘不同心等欲彊大
食細弱知慧反頓愚他物小大連相齧噬不謂之災
獨謂蟲食穀物爲應政事失道理之實不達物氣之
性也然夫蟲之生也必依溫濕溫濕之氣常在春夏
秋冬之氣寒而乾燥蟲未曾生若以蟲生罪鄉部吏

是則鄉部吏貪於春夏廉於秋冬雖盜跖之吏以秋
冬署蒙伯夷之舉矣夫春夏非一而蟲時生者溫濕
甚也甚則陰陽不和陰陽不和政也徒當歸於政治
而指謂部吏為姦失事實矣何知蟲以溫濕生也以
蠱蟲知之穀乾燥者蟲不生溫濕饑餒蟲生不禁藏
宿麥之種烈日乾暴投於燥罷則蟲不生如不乾暴
閘喋之蟲生如雲煙以蠱閘喋准况衆蟲溫濕所生
明矣詩云營營青蠅止于藩愷悌君子無信讒言讒
言傷善青蠅污白同一禍敗詩以為興昌邑王夢西

階下有積蠅矢明且召問郎中龔遂遂對曰蠅者讒人之象也夫矢積於階下王將用讒臣之言也由此言之蠅之爲蟲應人君用讒何故不謂蠅爲災乎如蠅可以爲災夫蠅歲生世間人君常用讒乎案蟲害人者莫如蚊蚋蚊蚋歲生如以蚊蚋應災世間常有害人之吏乎必以食物乃爲災人則物之最貴者也蚊蚋食人尤當爲災必以暴生害物乃爲災夫歲生而食人與時出而害物災孰爲甚人之病疥亦希非常疥蟲何故不爲災且天將雨螳出蚋蜚爲與氣相

應也或時諸蟲之生自與時氣相應如何輒歸罪於部吏乎天道自然吉凶偶會非常之蟲適生貪吏遭署人察貪吏之操又見災蟲之生則謂部吏之所爲致也

講瑞篇

儒者之論自說見鳳皇騏驎而知之何則案鳳皇騏驎之象又春秋獲麟文曰有麇而角麇而角者則是騏驎矣其見鳥而象鳳皇者則鳳皇矣黃帝堯舜周之盛時皆致鳳皇孝宣帝之時鳳皇集于上林後又

於長樂之宮東門樹上高五尺文章五色周獲麟
似麀而角武帝之麟亦如麀而角如有大鳥文章五
色獸狀如麀首戴一角考以圖象驗之古今則鳳麟
可得審也夫鳳皇鳥之聖者也騏驎獸之聖者也五
帝三王臯陶孔子人之聖也十二聖相各不同而欲
以麀戴角則謂之騏驎相與鳳皇象合者謂之鳳皇
如何夫聖鳥獸毛色不同猶十二聖骨體不均也戴
角之相猶戴午也顓頊戴午堯舜必未然今魯所獲
麟戴角卽後所見麟未必戴角也如用魯所獲麟求

知世間之麟則必不能知也何則毛羽骨角不合同也假令不同或時似類未必真是虞舜重瞳王莽亦重瞳晉文駢脅張儀亦駢脅如以骨體毛色比則王莽虞舜而張儀晉文也有若在魯最似孔子孔子死弟子共坐有若問以道事有若不能對者何也體狀似類實性非也今五色之鳥一角之獸或時似類鳳皇騏驎其實非真而說者欲以骨體毛色定鳳皇騏驎誤矣是故顏淵度幾不似孔子有若怕庸反類聖人由是言之或時真鳳皇騏驎骨體不似怕庸鳥獸

毛色類真知之如何儒者自謂見鳳皇騏驎輒而知之則是自謂見聖人輒而知之也臯陶馬口孔子反字設後輒有知而絕殊馬口反字尚未可謂聖何則十二聖相不同前聖之相難以照後聖也骨法不同姓名不等身形殊狀生出異土雖復有聖何如知之栢君山謂楊子雲曰如後世復有聖人徒知其才能之勝已多不能知其聖與非聖人也子雲曰誠然夫聖人難知知能之美若栢楊者尚復不能知世儒懷庸庸之知齋無異之議見聖不能知可保必也夫不

能知聖則不能知鳳皇與騏驎世人名鳳皇騏驎何
用自謂能之乎夫上世之名鳳皇騏驎聞其鳥獸之
奇者耳毛角有奇又不妄翔苟遊與鳥獸爭飽則謂
之鳳皇騏驎矣世人之知聖亦猶此也聞聖人人之
奇者身有奇骨知能博達則謂之聖矣及其知之非
卒見暫聞而輒名之爲聖也與之偃伏從文受學然
後知之何以明之子貢事孔子一年自謂過孔子二
年自謂與孔子同三年自知不及孔子當一年二年
之時未知孔子聖也三年之後然乃知之以子貢知

孔子三年乃定世儒無子貢之才其見聖人不從之
學任倉卒之視無三年之接自謂知聖誤矣少正卯
在魯與孔子並孔子之門三盈三虛唯顏淵不去顏
淵獨知孔子聖也夫門人去孔子歸少正卯不徒不
能知孔子之聖又不能知少正卯門人皆惑子貢曰
夫少正卯魯之聞人也子爲政何以先之孔子曰賜
退非爾所及夫才能知佞若子貢尚不能知聖世儒
見聖自謂能知之妄也夫以不能知聖言之則亦知
其不能知鳳皇與騏驎也使鳳皇羽翮長廣騏驎體

高大則見之者以爲大鳥巨獸耳何以別之如必巨大別之則其知聖人亦宜以巨大春秋之時鳥有爰居不可以爲鳳皇長狄來至不可以爲聖人然則鳳皇騏驎與鳥獸等也世人見之何用知之如以中國無有從野外來而知之則是鸚鵡同也鸚鵡非中國之禽也鳳皇騏驎亦非中國之禽獸也皆非中國之物儒者何以謂鸚鵡惡鳳皇騏驎善乎或曰孝宣之時鳳皇集于上林羣鳥從上以千萬數以其衆鳥之長聖神有異故群鳥附從如見大鳥來集群鳥附之

則是鳳皇鳳皇審則定矣夫鳳皇與騏驎同性鳳皇見羣鳥從騏驎見衆獸亦宜隨案春秋之麟不言衆獸隨之宣帝武帝皆得騏驎無衆獸附從之文如以騏驎爲人所獲附從者散鳳皇人不獲自來蜚翔附從可見書曰簫韶九成鳳皇來儀大傳曰鳳皇在列樹不言羣鳥從也豈宣帝所致者異哉或曰記事者失之唐虞之君鳳皇實有附從上世久遠記事遺失經書之文未足以實也夫實有而記事者失之亦有實無而記事者生之夫如是儒書之文難以實事案

附從以知鳳皇未得實也且人有佞猾而聚者鳥亦有佞黠而從群者當唐虞之時鳳鸞愿宣帝之時佞黠乎其俱有聖人之德行動作之操不均同也無鳥附從或時是鳳皇羣鳥附從或時非也君子在世清節自守不廣結從出入動作人不附從豪猾之人任使用氣往來進退士衆雲合夫鳳皇君子也必以隨多者効鳳皇是豪黠爲君子也歌曲彌妙和者彌寡行操益清交者益鮮鳥獸亦然必以附從效鳳皇是用和多爲妙曲也龍與鳳皇爲比類宣帝之時黃

龍出于新豐群蛇不隨神雀鸞鳥皆衆鳥之長也其仁聖雖不及鳳皇然其從群鳥亦宜數十信陵孟嘗食客三千稱爲賢君漢將軍衛青及將軍霍去病門無一客亦稱名將太史公曰盜跖橫行聚黨數千人伯夷叔齊隱處首陽山鳥獸之操與人相似人之得衆不足以別賢以鳥附從審鳳皇如何或曰鳳皇騏驎太平之瑞也太平之際見來至也然亦有未太平而來至也鳥獸竒骨異毛卓絕非常則是矣何爲不可知鳳皇騏驎通常以太平之時來至者春秋之時

騏驎嘗嫌於王孔子而至光武皇帝生於濟陽鳳皇
來集夫光武始生之時成衰之際也時未太平而鳳
皇至如以自爲光武有聖德而來是則爲聖王始生
之瑞不爲太平應也嘉瑞或應太平或爲始生其實
難知獨以太平之際驗之如何或曰鳳皇騏驎生有
種類若龜龍有種類矣龜故生龜龍故生龍形色小
大不異於前者也見之父察其子孫何爲不可知夫
恒物有種類瑞物無種適生故曰德應龜龍然也人
見神龜靈龍而別之乎宋元王之時漁者網得神龜

焉漁父不知其神也方今世儒漁父之類也以漁父而不知神龜則亦知夫世人而不知靈龍也龍或時似蛇蛇或時似龍韓子曰馬之似鹿者千金良馬似鹿神龍或時似蛇如審有類形色不異王莽時有大鳥如馬五色龍文與衆鳥數十集于沛國蘄縣宣帝時鳳皇集于地高五尺與言如馬身高同矣文章五色與言五色龍文物色均矣衆鳥數十與言俱集附從等也如以宣帝時鳳皇體色衆鳥附從安知鳳皇則王莽所致鳥鳳皇也如審是王莽致之是非瑞也

如非鳳皇體色附從何爲均等且瑞物皆起和氣而
生生於常類之中而有詭異之性則爲瑞矣故夫鳳
皇之至也猶赤鳥之集也謂鳳皇有種赤鳥復有類
乎嘉禾醴泉甘露嘉禾生於禾中與禾中異穗謂之
嘉禾醴泉甘露出而甘美也皆泉露生出非天上有
甘露之種地下有醴泉之類聖治公平而乃沾下產
出也蓂莢朱草亦生在地集於衆草無常本根暫時
產出旬月枯折故謂之瑞夫鳳皇騏驎亦瑞也何以
有種類案周太平越常獻白雉白雉生短而白色耳

非有白雉之種也魯人得戴角之麋謂之騏驎亦或
時生於麋非有騏驎之類由此言之鳳皇亦或時生
於鵠鵠毛竒羽殊出異衆鳥則謂之鳳皇耳安得與
衆鳥殊種類也有若曰騏驎之於走獸鳳皇之於飛
鳥太山之於丘垤河海之於行潦類也然則鳳皇騏
驎都與鳥獸同一類體色詭耳安得異種同類而有
竒竒爲不世不世難審識之如何堯生丹朱舜生商
均商均丹朱堯舜之類也骨性詭耳絲生禹瞽瞍生
舜舜禹絲瞽瞍之種也知德殊矣試種嘉禾之實不

能得嘉禾恒見棗梁之粟莖穗怪竒人見叔梁紇不知孔子父也見伯魚不知孔子之子也張湯之父五尺湯長八尺湯孫長六尺孝宣鳳皇高五尺所從生鳥或時高二尺後所生之鳥或時高一尺安得常種種類無常故曾皙生參氣性不世顏路出回古今卓絕馬有千里不必騏驎之駒鳥有仁聖不必鳳皇之鶴山頂之溪不通江湖然而有魚水精自爲之也廢庭壞殿基上草生地氣自出之也按溪水之魚殿基上之草無類而出瑞應之自至天地未必有種類也

夫瑞應猶災變也瑞以應善災以應惡善惡雖反其
應一也災變無種瑞應亦無類也陰陽之氣天地之
氣也遭善而爲和遇惡而爲變豈天地爲善惡之政
更生和變之氣乎然則瑞應之出殆無種類因善而
起氣和而生亦或時政平氣和衆物變化猶春則鷹
變爲鳩秋則鳩化爲鷹蛇鼠之類輒爲魚鼈蝦蟇爲
鶉雀爲蜃蛤物隨氣變不可謂無黃石爲老父授張
良書去復爲石也儒知之或時太平氣和麇爲騏驎
鵠爲鳳皇是故氣性隨時變化豈必有常類哉褒姒

玄寵之子二龍齋也晉之二卿熊羆之裔也吞燕子
薏苡履大跡之語世之人然之獨謂瑞有常類哉以
物無種計之以人無類議之以體變化論之鳳皇騏
驎生無常類則形色何爲當同案禮記瑞命篇云雄
曰鳳雌曰皇雄鳴曰卽卽雌鳴足足詩云梧桐生矣
于彼高岡鳳皇鳴矣于彼朝陽萋萋嘒嘒喈喈
瑞命與詩俱言鳳皇之鳴瑞命之言卽卽足足詩云
雍雍喈喈此聲異也使聲審則形不同也使審同詩
與禮異世傳鳳皇之鳴故將疑焉案魯之獲麟云有

麇而角言有麇者色如麇也麇色有常若鳥色有常矣武王之時火流爲鳥云其色赤赤非鳥之色故言其色赤如似麇而色異亦當言其色白若黑今成事色同故言有麇麇無角有異於故故言而角也夫如是魯之所得麟者若麇之狀也武帝之時西巡狩得白麟一角而五趾角或時同言五趾者足不同矣魯所得麟云有麇不言色者麇無異色也武帝云得白麟色白不類麇故言有麇正言白麟色不同也孝宣之時九真貢獻麟狀如麇而兩角者孝武言一角不

同矣春秋之麟如麋宣帝之麟言如鹿鹿與麋小大相倍體不同也夫三王之時麟毛色角趾身體高大不相似類推此准後世麟出必不與前同明矣夫騏驎鳳皇之類騏驎前後體色不同而欲以宣帝之時所見鳳皇高五尺文章五色準前况後當復出鳳皇謂與之同誤矣後當復出見之鳳皇騏驎必已不與前世見出者相似類而世儒自謂見而輒知之柰何案魯人得麟不敢正名麟曰有麋而角者時誠無以知也武帝使謁者終軍議之終軍曰野禽并角明天

下同本也不正名驎而言野禽者終軍亦疑無以審也當今世儒之知不能過魯人與終軍其見鳳皇騏驎必從而疑之非恒之鳥獸耳何能審其鳳皇騏驎乎以體色言之未必等以鳥獸隨從多者未必善以希見言之有鸚鵡來以相竒言之聖人有竒骨體賢者亦有竒骨聖賢俱竒人無以別由賢聖言之聖鳥聖獸亦與恒鳥庸獸俱有竒怪聖人賢者亦有知而絕殊骨無異者聖賢鳥獸亦有仁善廉清體無竒者世或有富貴不聖身有骨爲富貴表不爲聖賢驗然

則鳥亦有五采獸有角而無仁聖者夫如是上世所見鳳皇騏驎何知其非恒鳥獸今之所見鵲麋之屬安知非鳳皇騏驎也方今聖世堯舜之主流布道化仁聖之物何爲不生或時以有鳳皇騏驎亂於鵲鵲麋鹿世人不知羨玉隱在石中楚王令尹不能知故有抱玉泣血之痛今或時鳳皇騏驎以仁聖之性隱於恒毛庸羽無一角五色表之世人不之知猶玉在石中也何用審之爲此論草於永平之初時來有瑞其孝明宣惠衆瑞並至至元和章和之際孝章耀德

天下和洽嘉瑞奇物同時俱應鳳皇騏驎連出重見
盛於五帝之時此篇已成故不得載或問曰講瑞謂
鳳皇騏驎難知世瑞不能別今孝章之所致鳳皇騏
驎不可得知乎曰五鳥之記四方中央皆有大鳥其
出衆鳥皆從小大毛色類鳳皇實難知也故夫世瑞
不能別別之如何以政治時王之德不及唐虞之時
其鳳皇騏驎目不親見然而唐虞之瑞必真是者堯
之德明也孝宣比堯舜天下太平萬里慕化仁道施
行鳥獸仁者感動而來瑞物小大毛色足翼必不同

類以政治之得失主之明闇準况衆瑞無非真者事
或難知而易曉其此之謂也又以甘露驗之甘露和
氣所生也露無故而甘和氣獨已至矣和氣至甘露
降德洽而衆瑞湊案永平以來訖於章和甘露常降
故知衆瑞皆是而鳳皇騏驎皆真也

論衡卷第十六

終

論衡卷第十七

漢 會稽王充著

明 新安程榮校

指瑞篇

是應篇

治期篇

指瑞篇

儒者說鳳皇騏驎爲聖王來以爲鳳皇騏驎仁聖禽也思慮深避害遠中國有道則來無道則隱稱鳳皇騏驎之仁知者欲以褒聖人也非聖人之德不能致

鳳皇騏驎此言妄也夫鳳皇騏驎聖人亦聖聖人
恂恂憂世鳳皇騏驎亦宜率教聖人游于世間鳳皇
騏驎亦宜與鳥獸會何故遠去中國處於邊外豈聖
人濁鳳皇騏驎清哉何其聖德俱而操不同也如以
聖人者當隱乎十二聖宜隱如以聖者當見鳳麟亦
宜見如以仁聖之禽思慮深避害遠則文王拘於羑
里孔子厄於陳蔡非也文王孔子仁聖之人憂世憫
民不圖利害故其有仁聖之知遭拘厄之患凡人操
行能修身正節不能禁人加非於已案人操行莫能

過聖人聖人不能自免於厄而鳳麟獨能

一有自全而字

於世是鳥獸之操賢於聖人也且鳥獸之知不與人通何以能知國有道與無道也人同性類好惡均等尚不相知鳥獸與人異性何能知之人不能知鳥獸鳥獸亦不能知人兩不能相知鳥獸爲愚於人何以反能知之儒者咸稱鳳皇之德欲以表明王之治反令人有不及鳥獸論事過情使實不著且鳳麟豈獨爲聖王至哉孝宣皇帝之時鳳皇五至騏驎一至神雀黃龍甘露醴泉莫不畢見故有五鳳神雀甘露黃

龍之紀使鳳麟審爲聖王見則孝宣皇帝聖人也如
孝宣帝非聖則鳳麟爲賢來也爲賢來則儒者稱鳳
皇麒麟失其實也鳳皇麒麟爲堯舜來亦爲宣帝來
矣夫如是爲聖且賢也儒者說聖太隆則論鳳麟亦
過其實春秋曰西狩獲死麟人以示孔子孔子曰孰
爲來哉孰爲來哉反袂拭面泣涕沾襟儒者說之以
爲天以麟命孔子孔子不王之聖也夫麟爲聖王來
孔子自以不王而時王魯君無感麟之德怪其來而
不知所爲故曰孰爲來哉孰爲來哉知其不爲治平

而至爲已道窮而來望絕心感故涕泣沾襟以孔子
言孰爲來哉知麟爲聖王來也曰前孔子之時世儒
已傳此說孔子聞此說而希見其物也見麟之至怪
所爲來實者麟至無所爲來常有之物也行邁魯澤
之中而魯國見其物遭獲之也孔子見麟之獲獲而
又死則自比於麟自謂道絕不復行將爲小人所後
獲也故孔子見麟而自泣者據其見得而死也非據
其本所爲來也然則麟之至也自與獸會聚也其死
人殺之也使麟有知爲聖王來時無聖王何爲來乎

思慮深避害遠何故為魯所獲殺乎夫以時無聖王而麟至知不為聖王來也為魯所獲殺知其避害不能遠也聖獸不能自免於難聖人亦不能自免於禍禍難之事聖者所不能避而云鳳麟思慮深避害遠妄也且鳳麟非生外國也中國有聖王乃來至也生於中國長於山林之間性廉見希人不得害也則謂之思慮深避害遠矣生與聖王同時行與治平相遇世間謂之聖王之瑞為聖來矣剝巢破卵鳳皇為之不翔焚林而畋澆池而漁龜龍為之不遊鳳皇龜龍

之類也皆生中國與人相近巢剝卵破屏窠不翔林
焚池漉伏匿不遊無遠去之文何以知其在外國也
龜龍鳳皇同一類也希見不害謂在外國龜龍希見
亦在外國矣孝宣皇帝之時鳳皇騏驎黃龍神雀皆
至其至同時則其性行相似類則其生出宜同處矣
龍不生於外國外國亦有龍鳳麟不生外國外國亦
有鳳麟然則中國亦有未必外國之鳳麟也人見鳳
麟希見則曰在外國見遇太平則曰爲聖王來夫鳳
皇騏驎之至也猶醴泉之出朱草之生也謂鳳皇在

外國聞有道而來醴泉朱草何知而生於太平之時
醴泉朱草和氣所生然則鳳皇騏驎亦和氣所生也
和氣生聖人聖人生於衰世物生爲瑞人生爲聖同
時俱然時其長大相逢遇矣衰世亦有和氣和氣時
生聖人聖人生於衰世衰世亦有鳳麟也孔子生
於周之末世騏驎見於魯之西澤光武皇帝生於成
衰之際鳳皇集於濟陽之地聖人聖物生於盛衰世
聖王遭一有出聖物遭字見聖物猶吉命之人逢吉祥之類
也其實相遇非相爲出也夫鳳麟之來與白魚赤鳥

之至無以異也魚遭自躍王舟逢之火偶爲鳥王仰見之非魚聞武王之德而入其舟鳥知周家當起集於王屋也謂鳳麟爲聖王來是謂魚鳥爲武王至也王者受富貴之命故其動出見吉祥異物見則謂之瑞瑞有小大各以所見定德薄厚若夫白魚赤鳥小物小安之兆也鳳皇騏驎大物太平之象也故孔子曰鳳鳥不至河不出圖吾已矣夫不見太平之象自知不遇太平之時矣且鳳皇騏驎何以爲太平之象鳳皇騏驎仁聖之禽也仁聖之物至天下將爲仁聖

之行矣尚書大傳曰高宗祭成湯之廟有雉升鼎耳而鳴高宗問祖乙祖乙曰遠方君子殆有至者祖乙見雉有似君子之行今從外來則曰遠方君子將有至者矣夫鳳皇騏驎猶雉也其來之象亦與雉同孝武皇帝西巡狩得白麟一角而五趾又有木枝出復合於本武帝議問群臣謁者終軍曰野禽并角明同本也衆枝內附示無外也如此瑞者外國宜有降者是若應殆且有解編髮削左衽襲冠帶而蒙化焉其後數月越地有降者匈奴名王亦將數千人來降竟

如終軍之言終軍之言得瑞應之實矣推此以况白魚赤鳥猶此類也魚木精白者殷之色也鳥者孝鳥赤者周之應氣也先得白魚後得赤鳥殷之統絕色移在周矣據魚鳥之見以占武王則知周之必得天下也世見武王誅紂出遇魚鳥則謂天用魚鳥命使武王誅紂事相似類其實非也春秋之時鸚鵡來巢占者以爲凶夫野鳥來巢魯國之都且爲丘墟昭公之身且出奔也後昭公爲季氏所攻出奔於齊死不歸魯賈誼爲長沙太傅服鳥集舍發書占之云服鳥

入室主人當去其後賈誼竟去野鳥雖殊其占不異
夫鳳麟之來與野鳥之巢服鳥之集無以異也是鸛
鶴之巢服鳥之集偶巢適集占者因其野澤之物巢
集城宮之內則見魯國且凶傳舍人不吉之瑞矣非
鸛鶴服鳥知二國禍將至而故爲之巢集也王者以
天下爲家家人將有吉凶之事而吉凶之兆豫見於
人知者占之則知吉凶將至非吉凶之物有知故爲
吉凶之人來也猶著龜之有兆數矣龜兆著數常有
吉凶吉人卜筮與吉相遇凶人與凶相逢非著龜神

靈知人吉凶出兆見數以告之也虛居卜筮前無過客猶得吉凶然則天地之間常有吉凶吉凶之物來至自當與吉凶之人相逢遇矣或言天使之所爲也夫巨大之天使細小之物音語不通情指不達何能使物物亦不爲天使其來神怪若天使之則謂天使矣夏后孔甲畋于首山天雨晦冥入子民家主人方乳或曰後來之子必大貴或曰不勝之子必有殃夫孔甲之入民室也偶遭雨而廢庇也非知民家將生子而其子必凶爲之至也旣至人占則有吉凶矣夫

吉凶之物見於王朝若入民家猶孔甲遭雨入民室也孔甲不知其將生子爲之故到謂鳳皇諸瑞有知應吉而至誤矣

是應篇

儒者論太平瑞應皆言氣物卓異朱草醴泉翔鳳甘露景星嘉禾蕙脯蓂莢屈軼之屬又言山出車澤出舟男女異路市無二價耕者讓畔行者讓路頌白不提挈關梁不閉道無虜掠風不鳴條雨不破塊五日一風十日一雨其盛茂者致黃龍騏驎鳳皇夫儒者

之言有溢美過實瑞應之物或有或無夫言鳳皇騏
麟之屬大瑞較然不得增飾其小瑞徵應恐多非是
夫風氣雨露本當和適言其鳳翔甘露風不鳴條雨
不破塊可也言其五日一風十日一雨襄之也風雨
雖適不能五日十日正如其數言男女不相干市價
不相欺可也言其異路無二價襄之也太平之時豈
更爲男女各作道哉不更作道一路而行安得異乎
太平之時無商人則可如有必求便利以爲業買物
安肯不求賤賣貨安肯不求貴有求貴賤之心必有

二價之語此皆有其事而褒增過其實也若夫蕙脯
莫莢屈軼之屬殆無其物何以驗之說以實者太平
無有此物儒者言蕙脯生於庖厨者言厨中自生肉
脯薄如蕙形搖鼓生風寒涼食物使之不臭夫太平
之氣雖和不能使厨生肉蕙以爲寒涼若能如此則
能使五穀自生不須人爲之也能使厨自生肉蕙何
不使飯自蒸於甑火自燃於竈乎凡生蕙者欲以風
吹食物也何不使食物自不臭何必生蕙以風之乎
厨中能自生蕙則冰室何事而復伐冰以寒物乎人

夏月操蕙須手搖之然後生風從手握持以當疾風
蕙不鼓動言蕙脯自鼓可也須風乃鼓不風不動從
手風來自足以寒厨中之物何須蕙脯世言燕太子
丹使日再中天雨粟烏白頭馬生角厨門象生肉足
論之既虛則蕙脯之語五應之類恐無其實儒者又
言古者蓂莢夾階而生月朔日一莢生至十五日而
十五莢於十六日日一莢落至月晦莢盡來月朔一
莢復生王者南面視蓂生落則知日數多少不須煩
擾案日曆以知之也夫天既能生莢以爲日數何不

使莢有日名王者視莢之字則知今日名乎徒知日數不知日名猶復案曆然後知之是則王者視日則更煩擾不省莢莢之生安能爲福夫莢草之實也猶豆之有莢也春夏未生其生必於秋末冬月隆寒霜雪霽零萬物皆枯儒者敢謂莢莢達冬獨不死乎如與萬物俱生俱死莢成而以秋末是則季秋得察莢春夏冬三時不得案也且月十五日生十五莢於十六日莢落二十一日六莢落落莢棄殞不可得數猶當計未落莢以知日數是勞心苦意非善祐也使莢

生於堂上人君坐戶牖間望察莢生以知日數匪謂善矣今云夾階而生生於堂下也王者之堂墨子稱堯舜高三尺儒家以爲卑下假使之然高三尺之堂莢莢生於階下王者欲視其莢不能從戶牖之間見也須臨堂察之乃知莢數夫起視堂下之莢孰與懸曆日於扃坐傍顧輒見之也天之生瑞欲以娛王者須起察乃知日數是生煩物以累之也且莢草也王者之堂旦夕所坐古者雖質宮室之中草生輒耘安得生莢而入得經月數之乎且凡數日一二者欲以

紀識事也古有史官典曆主日王者何事而自數莢堯候四時之中命犧和察四星以占時氣四星至重猶不躬視而自察莢以數日也儒者又言太平之時屈軼生於庭之末若草之狀主指佞人佞人入朝屈軼庭末以指之聖王則知佞人所在夫天能故生此物以指佞人不使聖王性自知之或佞人本不生出必復更生一物以指明之何天之不憚煩也聖王莫過堯舜堯舜之治最爲平矣卽屈軼已自生於庭之末佞人來輒指知之則舜何難於知佞人而使臯陶

陳知人之術經曰知人則哲惟帝難之人含五常音
氣交通且猶不能相知屈軼草也安能知佞如儒者
之言是則太平之時草木踰賢聖也獄訟有是非人
情有曲直何不并令屈軼指其非而不直者必苦心

聽

一有獄字

訟三人斷獄乎故夫屈軼之草或時無有而

空言生或時實有而虛言能指假令能指或時草性
見人而動古者質朴見草之動則言能指能指則言
指佞人司南之杓投之於地其抵指南魚肉之蟲集
地北行夫蟲之性然也今草能指亦天性也聖人因

草能指宣言曰庭末有屈軼能指佞人百官臣子懷
姦心者則各變性易操爲忠正之行矣猶今府廷畫
臯陶觚觥也儒者說云觚觥者一角之羊也性知有
罪臯陶治獄其罪疑者令羊觸之有罪則觸無罪則
不觸斯蓋天生一角聖獸助獄爲驗故臯陶敬羊起
坐事之此則神奇瑞應之類也曰夫觚觥則復屈軼
之語也羊本二角觚觥一角體損於群不及衆類何
以爲奇豎三足曰能龜三足曰賁案能與賁不能神
於四足之龜豎一角之羊何能聖於兩角之禽狴狴

知往乾鵠知來鸚鵡能言天性能一不能爲二或時
鼈鼉之性徒能觸人未必能知罪人臯陶欲神事助
政惡受罪者之不厭服因鼈鼉觸人則罪之欲人畏
之不犯受罪之家沒齒無怨言也夫物性各自有所
知如以鼈鼉能觸謂之爲神則狴狴之徒皆爲神也
巫知吉凶占人禍福無不然者如以鼈鼉謂之巫類
則巫何竒而以爲善斯皆人欲神事立化也師尚父
爲周司馬將師伐紂到孟津之上杖鉞把旄號其衆
曰倉光倉光者水中之獸也善覆人船因神以化欲

今急渡不急渡倉光害汝則復鮭魴之類也河中有
此異物時出浮揚一身九頭人畏惡之未必覆人之
舟也尚父綠河有此異物因以威衆夫鮭魴之觸罪
人猶倉光之覆舟也蓋有虛名無其實效也人畏怪
竒故空褒增又言太平之時有景星尚書中候曰堯
時景星見於軫夫景星或時五星也大者歲星太白
也彼或時歲星太白行於軫度古質不能推步五星
不知歲星太白何如狀見大星則謂景星矣詩又言
東有啓明西有長庚亦或時復歲星太白也或時昏

見於西或時晨出於東詩人不知則名曰啓明長庚
矣然則長庚與景星同皆五星也太平之時日月精
明五星日月之類也太平更有景星可復更有日月
乎詩人俗人也中候之時質世也俱不知星王莽之
時太白經天精如半月使不知星者見之則亦復名
之曰景星爾雅釋四時章曰春爲發生夏爲長羸秋
爲收成冬爲安寧四氣和爲景星夫如爾雅之言景
星乃四時氣和之名也恐非着天之大星爾雅之書
五經之訓故儒者所共觀察也而不信從更爲大星

爲景星豈爾雅所言景星與儒者之所說異哉爾雅
又言甘露時降萬物以嘉謂之醴泉醴泉乃謂甘露
也今儒者說之謂泉從地中出其味甘若醴故曰醴
泉二說相遠實未可知案爾雅釋水泉章一見一否
曰灑檻泉正出正出涌出也沃泉懸出懸出下出也
是泉出之異輒有異名使太平之時更有醴泉從地
中出當於此章中言之何故反居釋四時章中言甘
露爲醴泉乎若此儒者之言醴泉從地中出又言甘
露其味甚甜未可然也儒曰道至大者日月精明星

辰不失其行翔風起甘露降雨濟而陰一者謂之甘
雨非謂雨水之味甘也推此以論甘露必謂其降下
時適潤養萬物未必露味甘也亦有露甘味如飴蜜
者俱太平之應非養萬物之甘露也何以明之案甘
露如飴蜜者着於樹木不着五穀彼露味甘者其
下時土地滋潤流濕萬物洽沾濡溥由此言之爾雅
且近得實緣爾雅之言驗之於物案味甘之露下着
樹木察所着之樹不能茂於所不着之木然今之甘
露殆異於爾雅之所謂甘露欲驗爾雅之甘露以萬

物豐熟災害不生此則甘露降下之驗也甘露下是則醴泉矣

治期篇

世謂古人君賢則道德施行施行則功成治安人君不肖則道德頽廢頽廢則功敗治亂古今論者莫謂不然何則見堯舜聖賢致太平桀紂無道治亂得誅如實論之命期自然非德化也吏百石以上若升食以下居位治民爲政布教教行與止民治與亂皆有命焉或才高行潔居位職廢或智淺操濇治民而立

上古之黜陟幽明考功據有功而加賞案無功而施
罰是考命而長祿非實才而厚能也論者因考功之
法據效而定賢則謂民治國安者賢君之所致民亂
國危者無道之所爲也故危亂之變至論者以責人
君歸罪於爲政不得其道人君受以自責愁神苦思
撼動形體而危亂之變終不減除空憤人君之心使
明知之主虛受之責世論傳稱使之然也夫賢君能
治當安之民不能化當亂之世良醫能行其針藥使
方術驗者遇未死之人得未死之病也如病窮病困

則雖扁鵲末如之何夫命窮病困之不可治猶夫亂
民之不可安也藥氣之愈病猶教導之安民也皆有
命時不可令勉力也公伯寮愬子路於季孫子服景
伯以告孔子孔子曰道之將行也與命也道之將廢
也與命也由此言之教之行廢國之安危皆在命時
非人力也夫世亂民逆國之危殆災害繫於上天賢
君之德不能消卻詩道周宣王遭大旱矣詩曰周餘
黎民靡有孑遺言無有可遺一人不被害者宣王賢
者嫌於德微仁惠盛者莫過堯湯堯遭洪水湯遭大

旱水旱災害之甚者也而二聖逢之豈二聖政之所
致哉天地歷數當然也以堯湯之水旱準百王之災
害非德所致非德所致則其福祐非德所爲也賢君
之治國也猶慈父之治家慈父耐平教明令耐使子
孫皆爲孝善子孫孝善是家興也百姓平安是國昌
也昌必有衰興必有廢興昌非德所能成然則衰廢
非德所能敗也昌衰興廢皆天時也此善惡之實未
言苦樂之效也家安人樂富饒財用足也案富饒者
命厚所致非賢惠所獲也人皆知富饒居安樂者命

祿厚而不知國安治化行者歷數吉也故世治非賢
聖之功衰亂非無道之致國當衰亂賢聖不能盛時
當治惡人不能亂世之治亂在時不在政國之安危
在數不在教賢不賢之君明不明之政無能損益世
稱五帝之時天下太平家有十年之蓄人有君子之
行或時不然世增其羨亦一有然字或時政致何以審之
夫世之所以爲亂者不以賊盜衆多兵革並起民棄
禮義負畔其上乎若此者由穀食乏絕不能忍饑寒
夫饑寒並至而能無爲非者寡然則溫飽並至而能

不爲善者希傳曰倉廩實民知禮節衣食足民知榮辱讓生於有餘爭起於不足穀足食多禮義之心生禮豐義重平安之基立矣故饑歲之春不食親戚穰歲之秋召及四隣不食親戚惡行也召及四隣善義也爲善惡之行不在人質性在於歲之饑穰由此言之禮義之行在穀足也案穀成敗自有年歲年歲水旱五穀不成非政所致時數然也必謂水旱政治所致不能爲政者莫過桀紂桀紂之時宜常水旱案桀紂之時無饑耗之災災至自有數或時返在聖君之

世實事者說堯之洪水湯之大旱皆有遭遇非政惡之所致說百王之害獨謂爲惡之應此見堯湯德優百王劣也審一足以見百明惡足以照善堯湯證百王至百王遭變非政所致以變見而明禍福五帝致太平非德所就明矣人之温病而死也先有凶色見於面部其病遇邪氣也其病不愈至於身死命壽訖也國之亂亡與此同驗有變見於天地猶人温病而死色見於面部也有水旱之災猶人遇氣而病也災禍不除至於國亡猶病不愈至於身死也論者謂變

徵政治賢人溫病色凶可謂操行所生乎謂水旱者
無道所致賢者遭病可謂無狀所得乎謂亡者為惡
極賢者身死可謂罪重乎夫賢人有被病而早死惡
人有完疆而老壽人之病死不在操行為惡也然則
國之亂亡不在政之是非惡人完疆而老壽非政平
安而常存由此言之禍變不足以明惡福瑞不足以
表善明矣在天之變日月薄蝕四十二月日一食五
十六月月亦一食食有常數不在政治百變千災皆
同一狀未必人君政教所致歲害鳥帑周楚有禍繼

然之氣見宋衛陳鄭皆災當此之時六國政教未必
失誤也歷陽之都一夕沈而為湖當時歷陽長吏未
必誑妄也成敗繫於天吉凶制於時人事未為天氣
已見非時而何五穀生地一豐一耗穀糶在市一貴
一賤豐者未必賤耗者未必貴豐耗有歲貴賤有時
時當貴豐穀價增時當賤耗穀直減夫穀之貴賤不
在豐耗猶國之治亂不在善惡賢君之立偶在當治
之世德自明於上民自善於下世平民安瑞祐並至
世則謂之賢君所致無道之君偶生於當亂之時世

擾俗亂災害不絕遂以破國亡身滅嗣世皆謂之爲
惡所致若此明於善惡之外形不見禍福之內實也
禍福不在善惡善惡之證不在禍福長吏到官未有
所行政教因前無所改更然而盜賊或多或寡災害
或無或有夫何故哉長吏秩貴當階平安以升遷或
命賤不任當由危亂以貶黜也以今之長吏况古之
國君安危存亡可得論也

論衡卷第十八

漢 會稽王充著

明 新安程榮校

自然篇

感類篇

齊世篇

自然篇

天地合氣萬物自生猶夫婦合氣子自生矣萬物之
生含血之類知饑知寒見五穀可食取而食之見絲
麻可衣取而衣之或說以爲天生五穀以食人生絲

麻以衣人此謂天爲人作農夫桑女之徒也不合自然故其義疑未可從也試依道家論之天者普施氣萬物之中穀愈饑而絲麻救寒故人食穀衣絲麻也夫天之不故生五穀絲麻以衣食人由其有災變不欲以譴告人也物自生而人衣食之氣自變而人畏懼之以若說論之厭於人心矣如天瑞爲故自然焉在無爲何居何以天之自然也以天無口目也案有爲者口目之類也口欲食而目欲視有嗜欲於內發之於外口目求之得以爲利欲之爲也今無口目之

欲於物無所求索夫何爲乎何以知天無口目也以地知之地以土爲體土本無口目天地夫婦也地體無口目亦知天無口目也使天體乎宜與地同使天氣乎氣若雲烟雲烟之屬安得口目或曰凡動行之類皆本無有爲有欲故動動則有爲今天動行與人相似安得無爲曰天之動行也施氣也體動氣乃出物乃生矣由人動氣也體動氣乃出子亦生也夫人之施氣也非欲以生子氣施而子自生矣天動不欲以生物而物自生此則自然也施氣不欲爲物而物

自爲此則無爲也。謂天自然無爲者，何氣也？恬澹無欲，無爲無事者也。老聃得以壽矣。老聃稟之於天，使天無此氣，老聃安所稟受此性？師無其說，而弟子獨言者，未之有也。或復於桓公公曰：以告仲父。左右曰：一則仲父，二則仲父爲君，乃易乎？桓公曰：吾未得仲父，故難已。得仲父，何爲不易？夫桓公得仲父，任之以事，委之以政，不復與知。皇天以至優之德，與王政而譴告人，則天德不若桓公，而霸君之操過上帝也。或曰：桓公知管仲賢，故委任之。如非管仲，亦將譴告之。

矣使天遭堯舜必無譴告之變曰天能譴告人君則亦能故命聖君擇才若堯舜受以王命委以王事勿復與知今則不然生庸庸之君失道廢德隨譴告之何天不憚勞也曹參爲漢相縱酒歌樂不聽政治其子諫之答之二百當時天下無擾亂之變淮陽鑄僞錢吏不能禁汲黯爲太守不壞一鑪不刑一人高枕安卧而淮陽政清夫曹參爲相若不爲相汲黯爲太守若郡無人然而漢朝無事淮陽刑錯者參德優而黯威重也計天之威德孰與曹參汲黯而謂天與王

政隨而譴告之是謂天德不若曹參厚而威不若汲黯重也蘧伯玉治衛子貢使人問之何以治衛對曰以不治治之夫不治之治無爲之道也或曰太平之應河出圖洛出書不畫不就爲不成天地出之有爲之驗也張良遊泗水之上遇黃石公授太公書蓋天佐漢誅秦故命令神石爲鬼書授人復爲有爲之效也曰此皆自然也夫天安得以筆墨而爲圖書乎天道自然故圖書自成晉唐叔虞一有魯成季友生文在其手故叔曰虞季曰友宋仲子生有文在其手

曰爲魯夫人三者之母之時文字成矣而謂天爲文字在母之時天使神持錐筆墨刻其身乎自然之化固疑難知外若有爲內實自然是以太史公紀黃石事疑而不能實也趙簡子夢上天見一男子在帝之側後出見人當道則前所夢見在帝側者也論之以爲趙國且昌之狀也黃石授書亦漢且興之象也妖氣爲鬼鬼象人形自然之道非或爲之也草木之生華葉青葱皆有曲折象類文章謂天爲文字復爲華葉乎宋人或刻木爲楮一本葉者三年乃成孔子曰

作約

使地三年乃成一葉則萬物之有葉者寡矣如孔子之言萬物之葉自爲生也自爲生也故能並成如天爲之其遲當若宋人刻楮葉矣觀鳥獸之毛羽毛羽之采色通可爲乎鳥獸未能盡實春觀萬物之生秋觀其成天地爲之乎物自然也如謂天地爲之爲之宜用手天地安得萬萬千千手並爲萬萬千千物乎諸物在天地之間也猶子在母腹中也母懷子氣十月而生鼻口耳目髮膚毛理血脉脂腴骨節爪齒自然成腹中乎母爲之也偶人千萬不名爲人者何也

鼻口耳目非性自然也武帝幸王夫人王夫人死思見其形道士以方術作夫人形形成出入宮門武帝大驚立而迎之忽不復見蓋非自然之真方士巧妄之僞故一見恍忽消散滅亡有爲之化其不可久行猶王夫人形不可久見也道家論自然不知引物事以驗其言行故自然之說未見信也然雖自然亦須有爲輔助耒耜耕耘因春播種者人爲之也及穀入地曰夜長夫人不能爲也或爲之者敗之道也宋人有閔其苗之不長者就而攬之明日枯死夫欲爲自

然者宋人之徒也問曰人生於天地天地無爲人稟
天性者亦當無爲而有爲何也曰至德純渥之人稟
天氣多故能則天自然無爲稟氣薄少不遵道德不
似天地故曰不肖不肖者不似也不似天地不類聖
賢故有爲也天地爲鑪造化爲工稟氣不一安能皆
賢賢之純者黃老是也黃者黃帝也老者老子也黃
者之操身中恬澹其治無爲正身共已而陰陽自和
無心於爲而物自化無意於生而物自成易曰黃帝
堯舜垂衣裳而天下治垂衣裳者垂拱無爲也孔子

曰大哉堯之爲君也惟天爲大惟堯則之又曰巍巍乎舜禹之有天下也而不與焉周公曰上帝引佚上帝謂舜禹也舜禹承安繼治任賢使能恭己無爲而天下治舜禹承堯之安堯則天而行不作功邀名無爲之化自成故曰蕩蕩乎民無能名焉年五十者擊壤於塗不能知堯之德蓋自然之化也易曰大人與天地合其德黃帝堯舜大人也其德與天地合故知無爲也天道無爲故春不爲生而夏不爲長秋不爲成冬不爲藏陽氣自出物自生長陰氣自起物自成

藏汲井決陂灌溉園田物亦生長需然而雨物之莖
葉根垓莫不洽濡程量澍澤孰與汲井決陂哉故無
爲之爲大矣本不求功故其功立本不求名故其名
成沛然之雨功名大矣而天地不爲也氣和而雨自
集儒家說夫婦之道取法於天地知夫婦法天地不
知推夫婦之道以論天地之性可爲惑矣夫天覆於
上地偃於下下氣蒸上上氣降下萬物自生其中間
矣當其生也天不須復與也由子在母懷中父不能
知也物自生子自成天地父母何與知哉及其生也

人道有教訓之義天道無爲聽恣其性故放魚於川
縱獸於山從其性命之欲也不驅魚令上陵不逐獸
令入淵者何哉拂詭其性失其所宜也夫百姓魚獸
之類也上德治之若烹小鮮與天地同操也商鞅變
秦法欲爲殊異之功不聽趙良之議以取車裂之患
德薄多欲君臣相憎怨也道家德厚下當其上上安
其下純蒙無爲何復譴告故曰政之適也君臣相忘
於治魚相忘於水獸相忘於林人相忘於世故曰天
也孔子謂顏淵曰吾服汝忘也汝之服於我亦忘也

以孔子爲君顏淵爲臣尚不能譴告況以老子爲君
文子爲臣乎老子文子似天地者也淳酒味甘飲之
者醉不相知薄酒酸苦賓主嘔噦夫相譴告道薄之
驗也謂天譴告曾謂天德不若淳酒乎禮者忠信之
薄亂之首也相譏以禮故相譴告三皇之時坐者于
于行者居居乍自以爲馬乍自以爲牛純德行而民
瞳矇曉惠之心未形生也當時亦無災異如有災異
不名曰譴告何則時人愚蠢不知相繩責也未世衰
微上下相非災異時至則造譴告之言矣夫今之天

古之天也非古之天厚而今之天薄也譴告之言生於今者人以心准況之也誥誓不及五帝要盟不及三王交質子不及五伯德彌薄者信彌衰心險而行諛則犯約而負教教約不行則相譴告譴告不改舉兵相滅由此言之譴告之言衰亂之語也而謂之上天爲之斯蓋所以疑也且凡言譴告者以人道驗之也人道君譴告臣上天譴告君也謂災異爲譴告夫人道臣亦有諫君以災異爲譴告而王者亦當時有諫上天之義其效何在苟謂天德優人不能諫優德

亦宜玄默不當譴告萬石君子有過不言對案不食
至優之驗也夫人之優者猶能不言皇天德大而乃
謂之譴告乎夫天無爲故不言災變時至氣自爲之
夫天地不能爲亦不能知也腹中有寒腹中疾痛人
不使也氣自爲之夫天地之間猶人背腹之中也謂
天爲災變凡諸怪異之類無小大薄厚皆天所爲乎
牛生馬桃生李如論者之言天神入牛腹中爲馬把
李實提桃間乎牢曰子云吾不試故藝又曰吾少也
賤故多能鄙事人之賤不用於大者類多伎能天尊

貴高大安能撰爲災變以譴告人且吉凶蜚色見於
面人不能爲色自發也天地猶人身氣變猶蜚色人
不能爲蜚色天地安能爲氣變然則氣變之見殆自
然也變自見色自發占候之家因以言也夫寒溫譴
告變動招致四疑皆已論矣譴告於天道尤詭故重
論之論之所以難別也說合於人事不入於道意從
道不隨事雖違儒家之說合黃老之義也

感類篇

陰陽不和災變發起或時先世遺咎或時氣自然賢

聖感類慊懼自思災變惡徵何爲至乎引過自責恐
有罪畏慎恐懼之意未必有其實事也何以明之以
湯遭旱自責以五過也聖人純完行無缺失矣何自
責有五過然如書曰湯自責天應以雨湯本無過以
五過自責天何故雨以無過致旱亦知自責不能得
雨也由此言之旱不爲湯至雨不應自責然而前旱
後雨一有之字者自然之氣也此言書之語也難之曰春
秋大雩董仲舒設土龍皆爲一時間也一時不雨恐
懼雩祭求陰請福憂念百姓也湯遭旱七年以五過

自責謂何時也夫遭旱一時輒自責乎旱至七年乃

自責也謂一時輒自責

一有也字

七年乃雨天應之誠何

其留也始謂七年乃自責憂念百姓何其遲也不合
雩祭之法不厭憂民之義書之言未可信也由此論
之周成王之雷風發亦此類也金縢曰秋大熟未穫
天大雷電以風禾盡偃大木斯拔邦人大恐當此之
時周公死儒者說之以爲成王狐疑於周公欲以天
子禮葬公公人臣也欲以人臣禮葬公公有王功狐
疑於葬周公之間天大雷雨動怒示變以彰聖功古

文家以武王崩周公居攝管蔡流言王意狐疑周公
周公奔楚故天雷雨以悟成王夫一雷一雨之變或
以爲蕪疑或以爲信讒二家未可審且訂蕪疑之說
秋夏之際陽氣尚盛未嘗無雷雨也故其拔木偃禾
頗爲狀耳當雷雨時成王感懼開金縢之書見周公
之功執書泣過自責之深自責適已天偶反風書家
則謂天爲周公怒也千秋萬夏不絕雷雨苟謂雷雨
爲天怒乎是則皇天歲歲怒也正月陽氣發泄雷聲
始動秋夏陽至極而雷折苟謂秋夏之雷

一有陽至極字爲

天大怒正月之雷天小怒乎雷為天怒雨為恩施使
天為周公怒徒當雷不當雨今雨俱至天怒且喜乎
子於是日也哭則不歌周禮子卯稷食菜羹哀樂不
並行哀樂不並行喜怒反并至乎秦始皇帝東封岱
嶽雷雨暴至劉媪息大澤雷雨晦冥始皇無道自同
前聖治亂自謂太平天怒可也劉媪息大澤夢與神
遇是生高祖何怒於生聖人而為雷雨乎堯時大風
為害堯激大風於青丘之野舜入大麓烈風雷雨堯
舜世之隆主何故於天天為風雨也大旱春秋雩祭

又董仲舒設土龍以類招氣如天應雩龍必爲雷雨何則秋夏之雨與雷俱也必從春秋仲舒之術則大雩龍求怒天乎師曠奏白雪之曲雷電下擊鼓清角之音風雨暴至苟爲雷雨爲天怒天何憎於白雪清角而怒師曠爲之乎此雷雨之難也又問之曰成王不以天子禮葬周公天爲雷風偃禾拔木成王覺悟執書泣過天乃反風偃禾復起何不爲疾反風以立大木必須國人起築之乎應曰天不能曰然則天有所不能乎應曰然難曰孟賁推人人仆接人而起接

人立天能拔木不能復起是則天力不如孟賁也秦
時三山亡猶謂天所徙也夫水之輕重孰與三山能
徙三山不能起大木非天用力宜也如謂三山非天
所亡然則雷雨獨天所爲乎問曰天之欲令成王以
天子之禮葬周公以公有聖德以公有王功經曰王
乃得周公死自以爲功代武王之說今天動感以彰
周公之德也難之曰伊尹相湯伐夏爲民興利除害
致天下太平湯死復相大甲大甲佚豫放之桐宮攝
政三年乃退復位周公曰伊尹格于皇天天所宜彰

也伊尹死時天何以不爲雷雨應曰以百雨篇曰伊尹死大霧三日大霧三日亂氣矣非天怒之變也東海張霸造百雨篇其言雖未可信且假以問天爲雷雨以悟成王成王未開金匱雷止乎已開金匱雷雨乃止也應曰未開金匱雷止也開匱得書見公之功覺悟泣過決以天子禮葬公出郊觀變天止雨反風禾盡起由此言之成王未覺悟雷雨止矣難曰伊尹霧三日天何不三日雷雨須成王覺悟乃止乎太戊之時桑穀生朝七日大拱太戊思政桑穀消亡宋景

公時熒守心出三善言熒惑徙舍使太戊不思政景
公無三善言桑穀不消熒惑不徙何則災變所以謹
告也所謹告未覺災變不除天之至意也今天怒爲
雷雨以責成王成王未覺雨雷之息何其早也又問
曰禮諸侯之子稱公子諸侯之孫稱公孫皆食采地
殊之衆庶何則公子公孫親而又尊得體公稱又食
采地名實相副猶文質相稱也天彰周公之功令成
王以天子禮葬何不令成王號周公以周王副天子
之禮乎應曰王者名之尊號也人臣不得名也難曰

人臣猶得名王禮乎武王伐紂下車追王大王王季
文王三人者諸侯亦人臣也以王號加之何為獨可
於三王不可於周公天意欲彰周公豈能明乎豈以
王迹起於三人哉然而王功亦成於周公江起岷山
流為濤瀨相濤瀨之流孰與初起之源秬鬯之所為
到白雉之所為來三王乎周公一有也周公功德盛
於三王不加王號豈天惡人妄稱之哉周衰六國稱
王齊秦更為帝當時天無禁怒之變周公不以天子
禮奠天為雷雨以責成王何天之好惡不純一乎又

問曰魯季孫賜曾子簀曾子病而寢之童子曰華而
睨者大夫之簀而曾子感慙命元易簀蓋禮大夫之
簀士不得寢也今周公人臣也以天子禮葬魂而有
靈將安之不也應曰成王所爲天之所予何爲不安
難曰季孫所賜大夫之簀豈曾子之所自制乎何獨
不安乎子疾病子路遣門人爲臣病間曰久矣哉由
之行詐也無臣而爲有臣吾誰欺欺天乎孔子罪子
路者也一有也字子路使門人爲臣非天之心
而妄爲之是欺天也周公亦非天子也以孔子之心

况周公周公必不安也季氏旅於太山孔子曰曾謂
泰山不如林放乎以曾子之細猶却非禮周公至聖
豈安天子之葬曾謂周公不如曾子乎由此原之周
公不安也大人與天地合德周公不安天亦不安何
故爲雷雨以責成王乎又問曰死生有命富貴在天
武王之命何可代乎應曰九齡之夢天奪文王年以
益武王克殷二年之時九齡之年未盡武王不豫則
請之矣人命不可請獨武王可非世常法故藏於金
滕不可復爲故掩而不見難曰九齡之夢武王已得

文王之年未應曰已得之矣難曰已得文王之年命當自延克殷二年雖病猶將不死周公何爲請而代之應曰人君爵人以官議定未之即與曹下案自然後可諾天雖奪文王年以益武王猶須周公請乃能得之命數精微非一卧之夢所能得也應曰九齡之夢能得也難曰九齡之夢文王夢與武王九齡武王夢帝予其九齡其天已予之矣武王已得之矣何須復請人且得官先夢得爵其後莫舉猶自得官何則兆象先見其驗必至也古者謂年爲齡已得九齡猶

人夢得爵也周公因必效之夢請之於天功安能大乎又問曰功無大小德無多少人須仰恃賴之者則爲美矣使周公不代武王武王病死周公與成王而致天下太平乎應曰成事周公輔成王而天下不亂使武王不見代遂病至死周公致太平何疑乎難曰若是武王之生無益其死無損須周公功乃成也周衰諸侯背畔管仲九合諸侯一匡天下孔子曰微管仲吾其被髮左衽矣使無管仲不合諸侯夷狄交侵中國絕滅此無管仲有所傷也程量有益管仲之功

偶於周公管仲死桓公不以諸侯禮葬以周公況之
天亦宜怒微雷薄雨不至何哉豈以周公聖而管仲
不賢乎夫管仲爲反坫有三歸孔子譏之以爲不賢
反坫三歸諸侯之禮天子禮葬王者之制皆以人臣
俱不得爲大人與天地合德孔子大人也譏管仲之
僭禮皇天欲周公之侵制非合德之驗書家之說未
可然也以見鳥跡而知爲書見蜚蓬而知爲車天非
以鳥跡命倉頡以蜚蓬使奚仲也奚仲感蜚蓬而倉
頡起鳥跡也晉文反國命徹麋墨舅犯心感舜位歸

家夫文公之徹麋墨非欲去舅犯舅犯感慙自同於
麋墨也宋華臣弱其宗使家賊六人以鉞殺華吳於
宋命合左師之後左師懼曰老夫無罪其後左師怨
咎華臣華臣備之國人逐瘞狗而華臣之門華
臣以爲左師來攻已也踰墻而走夫華臣自殺華吳
而左師懼國人自逐瘞狗而華臣自走成王之畏懼
猶此類也心疑於不以天子禮葬公卒遭雷雨之至
則懼而畏過矣夫雷雨之至天未必責成王也雷雨
至成王懼以自責也夫感則倉頡奚仲之心懼則左

師華臣之意也懷嫌疑之計遭暴至之氣以類之驗見則天怒之效成矣見類驗於寂寞猶感動而畏懼况雷雨揚軒轅之聲成王庶幾能不怵惕乎迅雷風烈孔子必變禮君子聞雷雖夜衣冠而坐所以敬雷懼激氣也聖人君子於道無嫌然猶順天變動况成王有周公之疑聞雷雨之變安能不振懼乎然則雷雨之至也殆且自天氣成王畏懼殆且感物類也夫天道無爲如天以雷雨責怒人則亦能以雷雨殺無道古無道者多可以雷雨誅殺其身必命聖人興師

王充論衡卷十九
一
動軍頓兵傷士難以一雷行誅輕以三軍尅敵何天之不憚煩也或曰紂父帝乙射天馭地游涇渭之間雷電擊而殺之斯天以雷電誅無道也帝乙之惡孰與桀紂鄒伯竒論桀紂惡不如亡秦亡秦不如王莽然而桀紂秦莽之地不以雷電孔子作春秋采毫毛之善貶纖介之惡采善不踰其美貶惡不溢其過責小以大夫夫人無之成王小疑天大雷雨如定以臣葬公其變何以過此洪範稽疑不悟災變者人之才不能盡曉天不以疑責備於人也成王心疑未決天以

大雷雨責之殆非皇天之意書家之說恐失其實也

齊世篇

語稱上世之人侗長佼好堅強老壽百歲左右下世之人短小陋醜夭折早死何則上世和氣純渥婚姻以時人民稟善氣而生生又不傷骨節堅定故長大老壽狀貌美好下世反此故短小夭折形面醜惡此言妄也夫上世治者聖人也下世治者亦聖人也聖人之德前後不殊則其治世古今不異上世之天下世之天也天不變易氣不改更上世之民下世之民

也俱稟元氣元氣純和古今不異則稟以爲形體者何故不同夫稟氣等則懷性均懷性均則形體同形體同則醜好齊醜好齊則夭壽適一天一地並生萬物萬物之生俱得一氣氣之薄渥萬世若一帝王治世百代同道人民嫁娶同時共禮雖言男三十而娶女二十而嫁法制張設未必奉行何以效之以今不奉行也禮樂之制存見於今今之人民肯行之乎今人不肯行古人亦不肯舉以今之人民知古之人民也物亦物也人生一世壽至一百歲生爲十歲兒時

所見地上之物生死改易者多至於百歲臨且死時
所見諸物與年十歲時所見無以異也使上世下世
民人無有異則百歲之間足以上筮六畜長短五穀
大小昆蟲草木金石珠玉蛭蠕動跂行喙息無有
異者此形不異也古之水火金之水火也今氣爲水
火也使氣有異則古之水清火熱而今水濁火寒乎
人生長六七尺大三四圍面有五色壽至於百萬世
不異如以上世人民侗長佼好堅彊老壽下世反此
則天地初立始爲人時長可如防風之君色如宋朝

壽如彭祖乎從當今至千世之後人可長如莢英色
如嫫母壽如朝生乎王莽之時長人生長一丈名曰
霸出建武年中潁川張仲師長一丈二寸張湯八尺
有餘其父不滿五尺俱在今世或長或短儒者之言
竟非誤也語稱上世使民以宜偃者抱關侏儒俳優
如皆侗長佼好安得偃侏之人乎語稱上世之人質
朴易化下世之人文薄難治故易曰上古之時結繩
以治後世易之以書契先結繩易化之故後書契難
治之驗也故夫必犧之前人民至質朴卧者居居坐

者于于羣居聚處知其母不識其父至必犧時人民
頗文知欲詐愚勇欲恐怯彊欲凌弱衆欲暴寡故宓
犧作八卦以治之至周之時人民文薄八卦難復因
襲故文王衍爲六十四首極其變使民不倦至周之
時人民久薄故孔子作春秋采毫毛之善貶纖介之
惡稱曰周監於二代郁郁乎文哉吾從周孔子知世
浸弊文薄難治故加密致之罔設纖微之禁檢狎守
持備具悉極此言妄也上世之人所懷五常也下世
之人亦所懷五常也俱懷五常之道共稟一氣而生

上世何以質朴下世何以文薄彼見上世之民飲血茹毛無五穀之食後世穿地爲井耕土種穀飲井食粟有水火之調又見上古巖居穴處衣禽獸之皮後世易以宮室有布帛之飾則謂上世質朴下世文薄矣夫罷業變易性行不異然而有質朴文薄之語者世有盛衰衰極久有弊也譬猶衣食之於人也初成鮮完始熟香潔少久穿敗連日臭茹矣文質之法古今所共一質一文一衰一盛古而有之非獨今也何以效之傳曰夏后氏之王教以忠上教以忠君子忠

其失也小人野救野莫如敬殷王之教以敬上教用
敬君子敬其失也小人鬼救鬼莫如文故周之王教
以文上教以文君子文其失也小人薄救薄莫如忠
承周而王者當教以忠夏所承唐虞之教薄故教以
忠唐虞以文教則其所承有鬼失矣世人見當今之
文薄也狎侮非之則謂上世朴質下世文薄猶家人
子弟不謹則謂他家子弟謹良矣語稱上世之人重
義輕身遭忠義之事得已所當赴死之分明也則必
赴湯趨鋒死不顧恨故弘演之節陳不占之義行事

比類書籍所載凶命捐身衆多非一今世趨利苟生
棄義妄得不相勉以義不相激以行義廢身不以爲
累行墮事不以相畏此言妄也夫上世之士今世之
士也俱含仁義之性則其遭事並有奮身之節古有
無義之人今有建節之士善惡雜廁何世無有述事
者好高古而下今貴所聞而賤所見辨士則談其久
者文人則著其遠者近有奇而辨不稱今有異而筆
不記若夫琅邪兒子明歲敗之時兄爲饑人所食自
縛叩頭代兄爲食餓人羨其義兩舍不食兄死收養

其孤愛不異於已之子歲敗穀盡不能兩活餓後其
子活兄之子臨淮許君叔亦養兄孤子歲倉卒之時
餓其親子活兄之子與子明同義會稽孟章父英爲
郡決曹掾郡將擣殺非辜事至覆考英引罪自予卒
代將死章後復爲郡功曹從役攻賊兵卒北敗爲賊
所射以身代將卒死不去此弘演之節陳不占之義
何以異當今著文書者肯引以爲比喻乎比喻之證
上則求虞夏下則索殷周秦漢之際功奇行殊猶以
爲後又况當今在百代下言事者目親見之乎畫工

好畫上代之人秦漢之士功行譎奇不肯圖今世之士者尊古卑今也貴鵠賤鷄鵠遠而雞近也使當今說道深於孔墨名不得與之同立行崇於曾顏聲不得與之鈞何則世俗之性賤所見貴所聞也有人於此立義建節實核其操古無以過爲文書者肯載於篇籍表以爲行事乎作奇論造新文不損於前人好事者肯舍久遠之書而垂意觀讀之乎楊子雲作太玄造法言張伯松不肯壹觀與之併肩故賤其言使子雲在伯松前伯松以爲金匱矣語稱上世之時聖

人德優而功治有奇故孔子曰大哉堯之爲君也唯
天爲大唯堯則之蕩蕩乎民無能名焉巍巍乎其有
成功也煥乎其有文章也舜承堯不墮洪業禹襲舜
不虧大功其後至湯舉兵伐桀武王把鉞討紂無巍
巍蕩蕩之文而有動兵討伐之言蓋其德劣而兵試
武用而化薄化薄不能相逮之明驗也及至秦漢兵
革雲擾戰力角勢秦以得天下旣得天下無嘉瑞之
美若叶和萬國鳳皇來儀之類非德劣不及功薄不
若之徵乎此言妄也夫天地氣和即生聖人聖人之

治即立大功和氣不獨在古先則聖人何故獨優世俗之性好褒古而毀今少所見而多所聞又見經傳增賢聖之美孔子尤大堯舜之功又聞堯禹禪而相讓湯武伐而相奪則謂古聖優於今功化渥於後矣夫經有褒增之文世有空加之言讀經覽書者所共見也孔子曰紂之不善不若是之甚也是以君子惡居下流天下之惡皆歸焉世常以桀紂與堯舜相反稱美則說堯舜言惡則舉紂桀孔子曰紂之不善不若是之甚也則知堯舜之德不若是其盛也堯舜之

禪湯武之誅皆有天命非優劣所能爲人事所能成也。使湯武在唐虞亦禪而不伐堯舜在殷周亦誅而不讓。蓋有天命之實而世空生優劣之語。經言叶和萬國時亦有丹朱鳳皇來儀時亦有有苗兵皆動而並用。則知德亦何優劣而小大也。世論桀紂之惡甚於亡秦實事者謂亡秦惡甚於桀紂秦漢善惡相反猶堯舜桀紂相違也。亡秦與漢皆在後世亡秦惡甚於桀紂則亦知大漢之德不劣於唐虞也。唐之萬國固增而非實者也有虞之鳳皇宣帝以五致之矣。考

明帝符瑞並至夫德優故有瑞瑞鈞則功不相下宣
帝孝明如劣不及堯舜何以能致堯舜之瑞光武皇
帝龍興鳳舉取天下若拾遺何以不及殷湯周武世
稱周之成康不虧文王之隆舜巍巍不虧堯之盛功
也方今聖朝承光武襲孝明有浸鄩溢美之化無細
小毫髮之虧上何以不逮舜禹下何以不若成康世
見五帝三王事在經傳之上而漢之記故尚一有善字爲
文書則謂古聖優而功大後世劣而化薄矣

論衡卷第十八終

論衡卷第十九

漢 會稽王充著

明 新安程榮校

宣漢篇

恢國篇

驗符篇

宣漢篇

儒者稱五帝三王致天下太平漢興已來未有太平
彼謂五帝三王致太平漢未有太平者見五帝三王
聖人也聖人之德能致太平謂漢不太平者漢無聖

帝也賢者之化不能太平又見孔子言鳳鳥不至河
不出圖吾已矣夫方今無鳳鳥河圖瑞頗未至悉具
故謂未太平此言妄也夫太平以治定爲效百姓以
安樂爲符孔子曰修己以安百姓堯舜其猶病諸百
姓安者太平之驗也夫治人以人爲主百姓安而陰
陽和陰陽和則萬物育萬物育則奇瑞出視今天下
安乎危乎安則平矣瑞雖未具無害於平故夫王道
定事以驗立實以效效驗不彰實誠不見時或實然
證驗不具是故王道立事以實不必具驗聖王治世

期於平安不須符瑞且夫太平之瑞猶聖主之相也
聖王骨法未必同太平之瑞何爲當等彼聞堯舜之
時鳳皇景星皆見河圖洛書皆出以爲後王治天下
當復若等之物乃爲太平用心若此猶謂堯當復比
齒舜當復八眉也夫帝王聖相前後不同則得瑞古
今不等而今王無鳳鳥河圖爲未太平妄矣孔子言
鳳皇河圖者假前瑞以爲語也未必謂世當復有鳳
皇與河圖也夫帝王之瑞衆多非一或以鳳鳥麒麟
或以河圖洛書或以甘露醴泉或以陰陽和調或以

百姓又安今瑞未必同於古古應未必合於今遭以
所得未必相襲何以明之以帝王興起命祐不同也
周則烏魚漢斬大蛇推論唐虞猶周漢也初興始起
事效物氣無相襲者太平瑞應何故當鈞以已至之
瑞效方來之應猶守株待兔之蹊藏身破置之路也
天下太平瑞應各異猶家人富殖物不同也或積米
穀或藏布帛或畜牛馬或長田宅夫樂米穀不愛布
帛歡牛馬不羨田宅則謂米穀愈布帛牛馬勝田宅
矣今百姓安矣符瑞至矣終謂古瑞河圖鳳皇不至

謂之未安是猶食稻之人入飯稷之鄉不見稻米謂
稷爲非穀也實者天下已太平矣未有聖人何以致
之未見鳳皇何以效實問世儒不知聖何以知今無
聖人也世人見鳳皇何以知之旣無以知之何以知
今無鳳皇也委不能知有聖與無又不能別鳳皇是
鳳與非則必不能定今太平與未平也孔子曰如有
王者必世然後仁三十年而天下平漢興至文帝時
二十餘年賈誼創議以爲天下洽和當改正朔服色
制度定官名興禮樂文帝初卽位謙讓未遑夫如賈

生之議文帝時已太平矣漢興二十餘年應孔子之言必世然後仁也漢一代之年數已滿太平立矣賈生知之况至今且三百年謂未太平誤也且孔子所謂一世三十年也漢家三百歲十帝耀德未平如何夫文帝之時固已平矣歷世持平矣至平帝時前漢已滅光武中興復致太平問曰文帝有瑞可名太平光武無瑞謂之太平如何曰夫帝王瑞應前後不同雖無物瑞百姓寧集風氣調和是亦瑞也何以明之帝王治平升封太山告安也秦始皇升封太山遭雷

雨之變治未平氣未和光武皇帝升封天晏然無雲
太平之應也治平氣應光武之時氣和人安物瑞等
至人氣已驗論者猶疑孝宣皇帝元康二年鳳皇集
於太山後又集於新平四年神雀集於長樂宮或集
於上林九真獻麟神雀二年鳳皇甘露降集京師四
年鳳皇下杜陵及上林五鳳三年帝祭南郊神光並
見或興子谷燭耀齋宮十有餘日明年祭后土靈光
復至至如南郊之時甘露神雀降集延壽萬歲宮其
年三月鸞鳳集長樂宮東門中樹上甘露元年黃龍

至見于新豐醴泉滂流彼鳳皇雖五六至或時一鳥而數來或時異鳥而各至麒麟神雀黃龍鸞鳥甘露醴泉祭后上天地之時神光靈耀可謂繁盛累積矣孝明時雖無鳳皇亦致麟甘露醴泉神雀白雉紫芝嘉禾金出鼎見離木復合五帝三王經傳所載瑞應莫盛孝明如以瑞應效太平宣明之年倍五帝三王也夫如是孝宣孝明可謂太平矣能致太平者聖人也世儒何以謂世未有聖人天之稟氣豈爲前世者渥後世者泊哉周有三聖文王武王周公並時猥出

漢亦一代也何以當少於周周之聖王何以當多於漢漢之高祖光武周之文武也文帝武帝宣帝孝明今上過周之成康宣王非以身生漢世可褒增頌歎以求媚稱也核事理之情定說者之實也俗好褒遠稱古講瑞上世爲美論治則古王爲賢睹竒於今終不信然使堯舜更生恐無聖名獵者獲禽觀者樂獵不見漁者之心不顧也是故觀於齊不虞魯遊於楚不懼宋唐虞夏殷同載在二尺四寸儒者推讀朝夕講習不見漢書謂漢劣不若亦觀獵不見漁游齊楚

不願宋魯也使漢有弘文之人經傳漢事則尚書春秋也儒者宗之學者習之將襲舊六爲七今上上王至高祖皆爲聖帝矣觀杜撫班固等所上漢頌頌功德符瑞汪濊深廣滂沛無量踰唐虞入皇城三代隘辟厥深洿沮也殷監不遠在夏后之世且舍唐虞夏殷近與周家斷量功德實商優劣周不如漢何以驗之周之受命者文武也漢則高祖光武也文武受命之降怪不及高祖光武初起之祐孝宣明之瑞羨於周之成康宣王孝宣孝明符瑞唐虞以來可謂盛矣

今上卽命奉成持滿四海混一天下定寧物瑞已極
人應訂隆唐世黎民雍熙今亦天下修仁歲遭運氣
穀頗不登迥路無絕道之憂深幽無屯聚之姦周家
越常獻白雉方今匈奴鄙善哀牢貢獻牛馬周時僅
治五千里內漢氏廓土收荒服之外牛馬珍於白雉
近屬不若遠物古之戎狄今爲中國古之裸人今被
朝服古之露首今冠章甫古之跣跣今履商舄以盤
石爲沃田以桀暴爲良民夷堦坳爲均平化不賓爲
齊民非太平而何夫實德化則周不能過漢論符瑞

則漢盛於周度土境則周狹於漢漢何以不如周獨
謂周多聖人治致太平儒者稱聖泰隆使聖卓而無
跡稱治亦泰盛使太平絕而無續也

恢國篇

顏淵喟然歎曰仰之彌高鑽之彌堅此言顏淵學於
孔子積累歲月見道彌深也宣漢之篇高漢於周擬
漢過周論者未極也恢而極之彌見漢奇夫經熟講
者要妙乃見國極論者恢奇彌出恢論漢國在百代
之上審矣何以驗之黃帝有涿鹿之戰堯有丹水之

師舜時有苗不服夏啓有扈叛逆高宗伐鬼方三年
剋之周成王管蔡悖亂周公東征前代皆然漢不聞
此高祖之時陳豨反彭越叛治始安也孝景之時吳
楚興兵怨鼂錯也匈奴時擾正朔不及天荒之地王
功不加兵今皆內附貢獻牛馬此則漢之威盛莫敢
犯也紂爲至惡天下叛之武王舉兵皆願就戰八百
諸侯不期俱至項羽惡微號而用兵與高祖俱起威
力輕重未有所定則項羽力勁折鐵難於摧木高祖
誅項羽折鐵武王代紂摧木然則漢力勝周多矣凡

克敵一則易二則難湯武伐桀紂一敵也高祖誅秦
殺項兼勝二家力倍湯武武王爲殷西伯臣事於紂
以臣伐周夷齊耻之扣馬而諫武王不聽不食周粟
餓死首陽高祖不爲秦臣光武不仕王莽誅惡伐無
道無伯夷之譏可謂順於周矣丘山易以起高淵滄
易以爲深起於微賤無所因階者難襲爵乘位尊祖
統業者易堯以唐侯入嗣帝位舜以司徒因堯授禪
禹以司空立功代舜湯由七十里文王百里武王爲
西伯襲承帝位三代之起皆有因緣力易爲也

高祖從亭長提三尺劍取天下光武由白水奮威武
海內無尺土所因一位所乘直奉天命推自然此則
起高於淵洿爲深於丘山也比方五代孰者爲優傳
書或稱武王代紂太公陰謀食小兒以丹令身純赤
長大教言殷亡殷民見兒身赤以爲天神及言殷亡
皆謂商滅兵至牧野晨舉脂燭姦謀惑民權掩不備
周之所諱也世謂之虛漢取天下無此虛言武成之
篇言周伐紂血流浮杵以武成言之食兒以丹晨舉
脂燭殆且然矣漢伐亡新光武將五千人王莽遣二

公將三萬人戰于昆陽雷雨晦冥前後不相見漢兵
出昆陽城擊二公軍一而當十二公兵敗天下以雷
雨助漢威敵孰與舉脂燭以人事譎取殷哉或云武
王伐紂紂赴火死武王就斬以鉞懸其首於大白之
旌齊宣王憐釁鍾之牛睹其色之觶鯨也楚莊王赦
鄭伯之罪見其肉袒而形暴也君子惡不惡其身紂
屍赴於火中所見悽愴非徒色之觶鯨袒之暴形也
就斬以鉞懸乎其首何其忍哉高祖入咸陽閹樂誅
二世項羽殺子嬰高祖雍容入秦不戮二屍光武入

長安劉聖公已誅王莽乘兵即害不乃王莽之死夫
斬赴火之首與貫被刃者之身德虐孰大也豈以菱
里之恨哉以人君拘人臣其逆孰與秦奪周國莽配
平帝也鄒伯奇論桀紂之惡不若亡秦亡秦不若王
莽然則紂惡微而周誅之痛秦莽罪重而漢伐之輕
寬狹誰也高祖母妊之時蛟龍在上夢與神遇好酒
貫飲酒舍負雉及醉留卧其上常有神怪夜行斬蛇
蛇嫗悲哭與呂后俱之田廬時自隱匿光氣暢見呂
后輒知始皇望見東南有天子氣及起五星聚於東

井楚望漢軍雲氣五色光武且生鳳皇集於城嘉禾
滋於屋皇妣之身夜半無燭空中光明初者蘇伯阿
望春陵氣鬱鬱葱葱光武起過舊廬見氣憧憧上屬
於天五帝三王初生始起不聞此怪堯母感於赤龍
及起不聞竒祐禹母吞薏苡將生得玄圭契母咽鸞
子湯起白狼銜鉤后稷母履大人之跡文王起得赤
雀武王得魚鳥皆不及漢太平之瑞黃帝堯舜鳳皇
一至凡諸衆瑞重至者希漢文帝黃龍玉牀武帝黃
龍麒麟連木宣帝鳳皇五至麒麟神雀甘露醴泉黃

龍神光平帝白雉黑雉孝明麒麟神雀甘露醴泉白
雉黑雉芝草連木嘉禾與宣帝同奇有神鼎黃金之
怪一代之瑞累仍不絕此則漢德豐茂故瑞祐多也
孝明天崩今上嗣位元二之間嘉德布流三年零陵
生芝草五本四年甘露降五縣五年芝復生六年黃
龍見大小凡八前世龍見不雙芝生無二甘露一降
而今八龍並出十一芝累生甘露流五縣德惠盛熾
故瑞繁夥也自古帝王孰能致斯儒者論曰王者推
行道德受命於天論衡初秉以爲王者生稟天命性

命難審且兩論之酒食之賜一則爲薄再則爲厚如
儒者之言五代皆一受命唯漢獨再此則天命於漢
厚也如審論衡之言生稟自然此亦漢家所稟厚也
絕而復屬死而復生世有久而復生之人人必謂之
神漢統絕而復屬光武存亾可謂優矣武王代紂庸
蜀之夷佐戰牧野成王之時越常獻雉倭人貢暢幽
厲衰微戎狄攻周平王東走以避其難至漢四夷朝
貢孝平元始元年越常重譯獻白雉一黑雉二夫以
成王之賢輔以周公越常獻一平帝得三後至四年

金城塞外羗良橋種良願等獻其魚鹽之地願內
屬漢遂得西王母石室因爲西海郡周時戎狄攻王
至漢內屬獻其寶地西王母國在絕極之外而漢屬
之德孰大壤孰廣方今哀牢鄯善諾降附歸德匈奴
時擾遣將攘討獲虜生口千萬數夏禹保入吳國太
伯採藥斷髮文身唐虞國界吳爲荒服越在九夷蜀
衣關頭今皆夏服褒衣履烏巴蜀越雋鬱林日南遼
東樂浪周時被髮椎髻今戴皮弁周時重譯今吟詩
書春秋之義君親無將將而必誅廣陵王荆迷於夔

巫楚王英惑於狹客事情列見孝明三宥二王吞藥
周誅管蔡違斯遠矣楚外家許氏與楚王謀議孝明
曰許民有屬於王欲王尊貴人情也聖心原之不繩
於法隱彊族傳懸書市里誹謗聖政今上海思犯奪
爵土惡其人者憎其骨餘立二王之子安楚廣陵彊
弟負嗣祀陰氏二王帝族也位爲王侯與管蔡同管
蔡滅嗣二王立後恩已褒矣隱彊異姓也尊重父祖
復存其祀立武庚之義繼祿父之恩方斯羸矣何則
並爲帝王舉兵相征貪天下之大絕成湯之統非聖

君之義失承天之意也隱疆臣子也漢統自在絕滅
陰氏無損於義而猶存之惠滂沛也故夫雨露之施
內則注於骨肉外則布於他族唐之晏晏舜之烝烝
豈能踰此驩兜之行靖言庸回共工私之稱薦於堯
三苗巧佞之人或言有罪之國鯀不能治水知力極
盡罪皆在身不加於上唐虞放流死於不毛怨惡謀
上懷挾叛逆考事失實誤國殺將罪惡重於四子孝
明加恩則論徙邊今上寬惠還歸州里開關以來恩
莫斯大晏子曰鉤星在房心之間地其動乎天地動

天時非政所致皇帝振畏猶歸於治廣徵賢良訪求
過關高宗之側身周成之開匱勵能逮此穀登歲平
庸主因緣以建德政顛沛危殆聖哲優者乃立功化
是故微病恒醫皆巧篤劇扁鵲乃良建初孟年無妄
氣至歲之疾疫也比旱不雨牛死民流可謂劇矣皇
帝敦德俊乂在官第五司空股肱國維轉穀振贍民
不乏餓天下慕德雖危不亂民饑於穀飽於道德身
流在道心回鄉內以故道路無盜賊之跡深幽迥絕
無劫奪之姦以危爲寧以困爲通五帝三王孰能堪

斯哉

驗符篇

永平十一年廬江皖侯國民際有湖皖民小男曰陳爵陳挺年皆十歲以上相與釣於湖涯挺先釣爵後往爵問挺曰釣寧得乎挺曰得爵即歸取竿綸去挺四十步所見湖涯有酒罇色正黃沒水中爵以爲銅也涉水取之滑重不能舉挺望見號曰何取爵曰是有銅不能舉也挺往助之涉水未持罇頓衍更爲盟盤動行入深淵中復不見挺爵留顧見如錢等正黃

數百千枝卽共掇攬各得滿手走歸示其家爵父國故免吏字君賢驚曰安所得此爵言其狀君賢曰此黃金也卽馳與爵俱往到金處水中尚多賢自涉水掇取爵挺隣伍並聞俱競採之合得十餘斤賢自言於相相言太守太守遣吏收取遣門下掾程躬奉獻具言得金狀詔書曰如章則可不如章有正法躬奉詔書歸示太守大守以下思省詔書以爲疑隱言之不實苟飾羨也卽復因却上得黃金實狀如前章事寢十二年賢等上書曰賢等得金湖水中郡牧獻訖

今不得直詔書下廬江上不畀賢等金直狀郡上賢
等所採金自官湖水非賢等私瀆故不與直十二年
詔書曰視時金價畀賢等金直漢瑞非一金出奇怪
故獨紀之金玉神寶故出詭異金物色先爲酒罇後
爲盟盤動行入淵豈不怪哉夏之方盛遠方圖物貢
金九牧禹謂之瑞鑄以爲鼎周之九鼎遠方之金也
人來貢之自出於淵者其實一也皆起盛德爲聖王
瑞金玉之世故有金玉之應文帝之時玉楛見金之
與玉瑞之最也金聲玉色人之奇也永昌郡中亦有

金焉纖靡大如黍粟在水涯沙中民採得日重五銖
之金一色正黃土生金土色黃漢土德也故金化出
金有三品黃比見者黃爲瑞也圮橋老父遺張良書
化爲黃石黃石之精出爲符也夫石金之類也質異
色鈞皆土瑞也建初三年零陵泉陵女子傳寧宅土
中忽生芝草五本長者尺四五寸短者七八寸莖葉
紫色蓋紫芝也太守沈鄩遣門下掾衍盛奉獻皇帝
悅懌賜錢衣食詔會公卿郡國上計吏民皆在以芝
告示天下天下並聞吏民歡喜咸知漢德豐雍瑞應

出也四年甘露下泉陵零陵洮陽始安冷道五縣榆
栢梅李葉皆洽薄威委流漉民嗽吮之甘如飴蜜五
年芝草復生泉陵男子周服宅上六本色狀如三年
芝并前凡十一本湘水去泉陵城七里水上聚石曰
燕室丘臨水有俠山其下巖淦水深不測二黃龍見
長出十六丈身大於馬舉頭顧望狀如圖中畫龍燕
室丘民皆觀見之去龍可數十步又見狀如駒馬小
大凡六出水邀戲陵上蓋二龍之子也并二龍爲八
出移一時乃入宣帝時鳳皇下彭城彭城以聞宣帝

詔侍中宋翁一翁一曰鳳皇當下京師集於天子之
郊乃達下彭城不可收與無下等宣帝曰方今天下
合爲一家下彭城與京師等耳何令可與無下等乎
今左右通經者語難翁一翁一窮免冠叩頭謝宣帝
之時與今無異鳳皇之集黃龍之出鈞也彭城零陵
遠近同也帝宅長遠四表爲界零陵在內猶爲近矣
魯人公孫臣孝文時言漢土德其符黃龍當見其後
黃龍見於成紀成紀之遠猶零陵也孝武孝宣時黃
龍皆出黃龍比出於茲爲四漢竟土德也賈誼創議

於文帝之朝云漢色當尚黃數以五爲名賈議智囊
之臣云色黃數五土德審矣芝生於土土氣和故芝
生土土爰稼稽稼稽作甘故甘露集龍見徃世不雙
唯夏盛時二龍在庭今龍雙出應夏之數治諧偶也
龍出徃世其子希出今小龍六頭並出遨戲象乾坤
六子嗣後多也唐虞之時百獸率舞今亦八龍遨戲
良久芝草延年仙者所食徃世生出不過一二今并
前後凡十一本多獲壽考之徵生育松喬之糧也甘
露之降徃世一所今流五縣應土之數德布濩也皇

瑞比見其出不空必有象爲隨德是應孔子曰知者樂仁者壽皇帝聖人故芝草壽徵生黃爲土色位在中央故軒轅德優以黃爲號皇帝寬惠德侔黃帝故龍色黃示德不異東方曰仁龍東方之獸也皇帝聖人故仁瑞見仁者養育之味也皇帝仁惠愛黎民故甘露降龍潛藏之物也陽見於外皇帝聖明招拔巖穴也瑞出必由嘉士祐至必依吉人也天道自然厥應偶合聖主獲瑞亦出群賢君明臣良庶事以康文武受命力亦周邵也

論衡卷第十九

終